

आकाशवाणी जयपुर-अजमेर
प्रादेशिक समाचार
दिनांक 16.08.2024 समय: 18.45 बजे

- डॉक्टरों के खिलाफ हिंसा के मामलों में 6 घंटे की मियाद में पुलिस में रिपोर्ट दर्ज करावणो जरूरी करी ज्यो।
- भारतीय अंतरिक्ष अनुसंधान संगठन-इसरो श्रीहरिकोटा में पृथ्वी अवलोकन उपग्रह ईओएस-08 कामयाबी सागे छोड़्यो।
- राज्य में एक आईएस अर 7 आईपीएस समेत 25 अहलकारों के तबादला करी ज्यो-डॉ. पृथ्वीराज राज्यपाल के सचिव बणायी ज्यो
- प्रदेश के न्यारा-न्यारा हलकों में जोरदार बिखरा रो दौर जारी-केई ठौड़ों पाणी भरण के कारण जिन्दगी में असर पड़्यो।

000

डॉक्टरों के खिलाफ हिंसा के मामला में छह घंटे की मियाद में संबंधित संस्थान के ओर में एफ.आई.आर. करावणो जरूरी कर दियो ज्यो है। स्वास्थ्य सेवा महानिदेशक अतुल गोयल ई बाबू केन्द्र सरकार के अस्पतालों अर मेडिकल कॉलेजों के मुखिया के कागद लिख्यो है। कोलकाता में लारला दिनांक एक डॉक्टर के हित्ये के खिलाफ रेजिडेंट डॉक्टरों के काम परों नी आवण के ध्यान राखता थकां ओ फ़ैसलो करी ज्यो है। ई वारदात के खिलाफ प्रदेश के डॉक्टर आज ई हडताल कीनी, ज्यो कारण ईलाज के काम में असर पड़्यो। बीकानेर में रेजिडेंट डॉक्टर्स मेडिकल कॉलेज में कलेक्ट्रेट ताई रैली निकाली। जयपुर में ई डॉक्टरों के काम परों नी आवण के कारण मरीजों के घणी परेशानी के सामो करणो पड़्यो। ई बीच भारतीय चिकित्सा संघ काल संवारे छह बज्यों में 24 घंटे सारू देश भर में गैर-आपातकालीन सेवा बंद राखण के ऐलाण कीनो। चिकित्सा संघ के मुजब सगळी जरूरी अर आपातकालीन सेवा जारी रहवेला।

000

भारतीय अंतरिक्ष अनुसंधान संगठन-इसरो आज श्री हरिकोटा में संवारे नौ बजे 17 मिनट परों उपग्रह छोडबा के नान्हा यान-एस.एस.एल.वी.-डी-3 के जरिये कुछ उपग्रह कामयाबी सागे छोड़्यो। इसरो धरती के नीचली कक्षा में 500 किलोग्राम वजन ताई के उपग्रह ले जावण सारू ई प्रक्षेपण यान के विकास कीनो है। 34 मीटर लम्बो अर करीब 119 टन वजन के ओ यान विकसित करण में करीब 56 करोड़ रुपया के खर्च आयो है।

000

चुनाव आयोग जम्मू-कश्मीर अर हरियाणा विधानसभा चुनाव के कार्यक्रम के ऐलाण कर दीनो है। जम्मू-कश्मीर में परिसीमन पाछे बणी 90 सीटों में चुनाव सारू 18 सितम्बर, 25 सितम्बर अर 1 अक्टूबर के वोट पड़ेला। हरियाणा विधानसभा के 90 सीटों सारू पूरा प्रदेश में एके सागे एक अक्टूबर के वोट पड़ेला। वोटों के गिणती 4 अक्टूबर के करी जावेला।

000

देश के पैली वाळा प्रधानमंत्री अर भारत रत्न मान में नवाजी ज्यो अटल बिहारी वाजपेयी के आज वां के बरसी के मौके राष्ट्रपति द्रौपदी मुर्मू, उपराष्ट्रपति जगदीप धनखड़ अर प्रधानमंत्री नरेंद्र मोदी समाधि में फूल चढ़ा के याद कीना। लोकसभा अध्यक्ष ओम बिर्ला, राज्यसभा के उपसभापति हरिवंश अर रक्षा मंत्री राजनाथ सिंह समेत केई नेता ई वां के श्रद्धांजलि दीनी। सोशल मीडिया पोस्ट के जरिये प्रधानमंत्री नरेन्द्र मोदी कह्यो के अटल बिहारी वाजपेयी के देश बणावण में वां के योगदान सारू याद कर्या जावे है। मुख्यमंत्री भजन लाल शर्मा ई अटल बिहारी वाजपेयी के याद करता थकां सोशल मीडिया के जरिये कह्यो के वाजपेयी के अटल व्यक्तित्व अर विचार हमेशा सीख देता रहवेला।

000

राज्य सरकार भारतीय प्रशासनिक सेवा रा एक, भारतीय पुलिस सेवा रा 7 अर राजस्थान प्रशासनिक सेवा रा 17 अहलकारां रा तबादला कर दीना है। भारतीय प्रशासनिक सेवा रा आला अहलकार डॉ. पृथ्वीराज ने राज्यपाल रा सचिव बनायी ज्या है। वे गौरव गोयल री ठौड़ लेवेला जो लोकसभा रा संयुक्त सचिव बनायी ज्या है। भारतीय पुलिस सेवा री आला अहलकार लता मनोज कुमार ने राजस्थान पुलिस अकादमी मांय तैनात करी ज्यी है। वां रे अलावा उपमहानिरीक्षक स्तर रा दो अर पुलिस अधीक्षक स्तर रा चार अहलकारां रा ई तबादला करी ज्या है। केई जिलां मांय अतिरिक्त जिला कलेक्टर रा ओहदा माथे काम करण वाळा आर.ए.एस. अहलकार ई बदली ज्या है। जोगाराम को श्रम, कारखाना एवं वॉयलर निरीक्षण के शासन सचिव का अतिरिक्त चार्ज दिया गया है।

000

भरतपुर रा लोहागढ़ स्टेडियम मांय 19 ऊं 26 अगस्त तांई अग्निवीर भर्ती रैली राख्यी जावेला। रैली मांय भरतपुर, डीग, धौलपुर, अलवर, खैरथल –तिजारा, कोटपूतली–बहरोड़ जिला रा नौजवान सिरकत कर सकेला। जिला कलेक्टर डॉ. अमित यादव भर्ती रैली री तैयारियां रो जायजो लेवण सारू अहलकारां सागे मीटिंग कीनी।

000

प्रदेश रा न्यारा–न्यारा हलकां मांय जोरदार मेह बरस रह्यो है। लारला 24 घंटा मांय केई ठौड़ां भारी ऊं घणी भारी बिरखा दर्ज करी ज्यी। बूंदी जिला रा हिंडोली मांय सब ऊं बत्ती 220 मिलीमीटर बिरखा दर्ज करी ज्यी। अजमेर जिला रा मांगलियावास मांय 200 मिलीमीटर ऊं बत्तो पाणी बरस्यो। बीकानेर, अजमेर, नागौर, पाली, दौसा अर सवाईमाधोपुर जिलां मांय ई कटे–कटे जोरदार मेह बरस्यो। भारी बारिश रे कारण जयपुर शहर रा चार दीवारी हलका मांय तीन मंजिल रो एक मकान ढस ग्यो, हालांकि ई कारण जान रा नुकसाण रो कोई समाचार नी है। जयपुर कने जोबनेर मांय लारला दो दिन रे दौरान व्ही जोरदार बिरखा पाछे बाढ़ सरीखा हालात बण गया है। वठे चिरनोटिया तळाव कने बणया मकान मांय तेज बारिश पाछे कटाव ऊं मकान ढस ग्यो। जोबनेर मांय प्रशासन री ओर ऊं राहत रा काम सरू कर दिया ज्या है। पाली जिला मांय ई केई ठौड़ां भारी बिरखा दर्ज करी ज्यी। हनुमानगढ़ जिला मांय आज ई हल्की ऊं मझला दर्जा री बिरखा रो दौर चालतो रह्यो। बीकानेर मांय भारी बिरखा री चेतावनी पाछे प्रशासन कटाव वाळा गेलां माथे आवण–जावण बंद करण रा हुकम दीना है। नागौर जिला मांय व्ही भारी बिरखा बीचे खीवसर मांय बाढ़ रा हालात पैदा व्हे गया है। वठे एक मकान पड़ ग्यो। पाली मांय ई केई ठौड़ां जोरदार बिरखा रा समाचार है। सवाईमाधोपुर जिला मांय लारला 24 घंटा मांय 118 मिली मीटर बिरखा मापी ज्यी। ब्यावर मांय जोरदार बिरखा ने ध्यान राखता थकां 12वीं कक्षा तांई रा विद्यार्थियां सारू काल तांई छुट्टी रो ऐलाण कर दियो ज्यो है। जैसलमेर जिला रा केई हलकां मांय ई तेज बारिश व्ही है। जिला रा भणियाणा, राजमथाई अर नाचना हलका मांय व्ही जोरदार बिरखा ऊं जिन्दगी माथे असर पड़्यो है। बाड़मेर अर जालौर जिलां आज आखा दिन रूक–रूक मेह बरस्यो। चित्तौड़गढ़ जिला रा रावतभाटा मांय मंडेसरा हलका रा पाड़ाझर झरना माथे काल गोठ मनावण गया लोग पाणी रा तेज बहाव बीचे फंस गया, ज्यां ने आज बचाव दल निकाल्या। ई बीचे टोंक री जिला कलेक्टर मांशी बांध रो दौर कर र बांध ऊं पाणी री निकासी अर हिफाजत ऊं जुड़्या इन्तजामात रो जायजो लीनो। वे जनता ऊं बांध रा जल भराव अर नदी नाळां मांय पाणी रा तेज बहाव ऊं दूर रहवण री अपील कीनी। जिला कलेक्टर कह्यो के किसानां ने फसल खराबा रो मुआवजो दिरावण सारू गिरदावरी करावण रा हुकम दिया ज्या है। बीसलपुर बांध मांय पाणी रो लेवल 312 दशमलव 95 आरएल मीटर व्हे ग्यो है।

मौसम केंद्र जयपुर रा निदेशक राधेश्याम शर्मा बतायो के आज जैसलमेर अर जोधपुर मांय भारी बारिश रो रेड अलर्ट जारी करी ज्यो है। बाड़मेर, बीकानेर, नागौर अर पाली जिलां सारू आज बिरखा रो ऑरेंज अलर्ट जारी करी ज्यो है।

.....

बांग्लादेश मांय हिन्दू धर्म मानबा वाळां रे खिलाफ लारला दिनां व्ह्या हमलां अर अत्याचार रे खिलाफ आज झालावाड मांय राधारमण परिसर ऊं मोटी तादाद मांय लोग आक्रोश रैली निकाळी। हिंदू संगठनां रा कार्यकर्ता हनुमान चालीसा रो पाठ कीनो अर बांग्लादेश मांय हिंदुआं री हिफाजत तैय करण री मांग मांग करता थकां राष्ट्रपति रे नाम जिला कलेक्टर ने पानडी सूपी। जोधपुर ग्रामीण जिला रा पीपाड मांय ई सर्व समाज री ओर ऊं मौन जुलूस निकाळ र प्रधानमंत्री रे नाम पानडी सूपी ज्यी। जालौर मांय ई न्यारा-न्यारा संगठनां री ओर ऊं बंद राख र मौन जुलूस निकाळी ज्यो अर जिला कलेक्टर ने राष्ट्रपति रे नाम पानडी सूपी ज्यी।

000

राजसमंद जिला रा पिपलांत्री गांव मांय आज पर्यावरण महोत्सव मनायी ज्यो। ई मौके साल भर मांय जन्मी टाबरियां रा नाम ऊं पौधा रोपी ज्यो। ई सागे ई पैली लगायी ज्यो पौधा रे राखी बांध र पेड बचावण रो संकल्प लियो ज्यो।

000

उदयपुर मांय दो विद्यार्थियां बीचे व्ही झडप अर चाकूबाजी पाछे न्यारी-न्यारी ठौडां आगजनी री वारदातां व्ही अर दुकानां बंद करा दीरीजी। ई पाछे पुलिस री समझाइश पाछे शहर मांय अब शांति है। चाकूबाजी री वारदात मांय जखमी युवक री हालत स्थिर है अर वां ने डॉक्टरां री निगराणी मांय राखी ज्यो है। जिला कलेक्टर अफवाहां माथे ध्यान नी देवण री अपील कीनी है।

000

बांसवाड़ा रा संभागीय आयुक्त डॉ. नीरज के पवन आज डूंगरपुर जिला मांय वीडियो कांफ्रेंसिंग रे जरिये जनता री समस्यावां सुणी अर अहलकारां ने परेशानियां आगी कारण रा हुकम दीना। झालावाड रा जिला कलेक्टर मिनी सचिवालय ऊं वीडियो कॉन्फ्रेंसिंग रे जरिये जनसुणवाई कीनी। वे केई मामला मौके ई निपटाया अर दूजा मामला बेगा निपटावण सारू अहलकारां ने जरूरी हुकम दीना। जैसलमेर रा जिला कलेक्टर प्रताप सिंह 61 मामलां री सुणवाई कीनी। वे मुख्यमंत्री सूर्यघर योजना रो प्रचार करण रा हुकम दीना।

000

सवाईमाधोपुर जिला री 16 ग्राम पंचायत रे टीबी मुक्त व्हेवण रो ऐलाण कर दियो ज्यो है। जिला रा सीएचएमओ डॉ. धर्मसिंह मीना बतायो के टीबी मुक्त सगळी पंचायतां रो जिला स्तर माथे मान कर्यो जावेला।